



Me ne batto o belin

Di Fabio Bruno

G'ho l'artrite e a testa gianca
pe ûnn-a vitta ho travaggiôu
ma me son accattôu ûnn-a bici
e ôa paggio trasformôu,
o mæ chêu o batte ciù forte
comme quand'eo ûn zoenottin
mi me sento de vint'anni
e me ne batto o belin!

Quande mi m'adescio inverso
no gh'é nint'ätro da fâ
che pensäme in çimma da bici
sciú pe i monti o in faccia a-o mâ,
no me vegne in chêu ciù ninte
a fadiga, o cädo, a sæ,
mi m'ascordo ascì l'etæ
e me ne batto o belin!

Mæ moggê a no m'accapisce
e a me dixè: «No ti pêu
andâ in giò co-e braghe cûrte
e a maggetta da figgiêu,
ti ti zêughi a fâ o campion
ma t'ei solo ûn fanfaron
che da-a seia a-o mattin
o se ne batte o belin!».

I chillometri che fasso
pe mi son de lungo ûn prô
seggian pochi o seggian tanti
sotta l'ægua o sotta o sô,
se me tocca ûnn-a disceiza
sotta a maggia g'ho ûn pappê
co-i mæ occiali e o berettin
mi me ne batto o belin!

Dove vaddo, donde vegno
se comenso a pedalâ
o no g'ha guæi importansa
mi no o fasso pe guagnâ
ûnn-a coppa o ûnn-a medaggia
no son fæto pe corrî
m'ammîo in giò, vaddo cianin
e me ne batto o belin!

Quæ traguardi, quæ avversài?
Se a cadenn-a a me sâtiâ
m'affermiô co-ûn fattoriso
no g'ho sprescia d'arrivâ,
finn-a quande mi g'aviô
ûn pâ de rœe co-un sellin
saiô de tûtti o ciù felice
e me ne battiô o belin!

Premio speciale della Giuria per la poesia dialettale al concorso di micro letteratura "Come ti racconto la bici" edizione 2011, promosso dal Circolo FIAB Amici della Bicicletta di Genova in collaborazione con la Biblioteca Civica Berio.